



55578


II

Mag. St. Dr.

P

kat. komp.







*Metem 698*  
AD

MAGNIFICOS DVVMVIROS  
**ALBERTVM  
BORKOWSKI**

CIVIT. THORVNENSIS PRAE-CONSVLEM  
H. T. PRO - PRAESIDEM, IVDICII TERRESTRIS  
PALATINATVS CVLMENSIS ASSESSOREM

ET

**ANTONIUM  
GIERINGIVM**

EIVSDEM CIVITAT. THORVNENSIS PRAE-  
CONSVLEM ET PROTO-SCHOLARCHAM

SVPER INGRESSV ET EGRESSV

**ANNI CLIMACTERICI MAGNI**

ALTERIVS A. D. XXIX IVN.

ALTERIVS A. D. XXX OCT.

*GRATVLATORIA EPISTOLA*  
**SAMVELIS LVTH. GERETI, THORVN.**

LL. AA. St.

GEDANI,

TYPIS THOMAE IOHANNIS SCHREIBERI

TYPOGRAPH



MAGNIFICOS DVMVIROS  
ALBERTVM  
BORRKOWSKI

CIVIT. THORVN. PRAE. CONSUL. M.  
H. PRO. PARISH. IUDIC. TERRIT. M.  
M. CIVIT. THORVN. PRAE. CONSUL. M.



55528  
ANTONIUM  
GERRINGHAM

THORVN. CIVIT. THORVN. CIVIT. THORVN. CIVIT.  
CIVIT. THORVN. CIVIT. THORVN. CIVIT. THORVN. CIVIT.

ANNI CLIMACTERICI MAGNI

ALTERIVS A. D. XXXIX. I. N. V.  
ALTERIVS A. D. XXX. OCT. I. N. V.  
GERRINGHAM CIVIT. THORVN. CIVIT. THORVN. CIVIT.

ALTERIVS A. D. XXXIX. I. N. V.  
ALTERIVS A. D. XXX. OCT. I. N. V.  
GERRINGHAM CIVIT. THORVN. CIVIT. THORVN. CIVIT.



# MAGNIFICI DOMINI,



Nemo est eorum, qui bene huic civitati cupiunt, qui non cum omni felicitatum genere, quae VOBIS contingant, rectoribus illius, laetetur semper, tum vero hoc, quod iucunde imprimis in hunc annum incidit, ut idem ambobus magni illius anni climacterici, alteri initium, alteri finem afferat. Is est enim, DOMINI, concursus ille, cuius ut grata atque suavis per se cogitatio est, sic hilaritas ex eo capienda tanta, quam etiam e vultu sincere gratulantium legere debeatis. Hos nimirum aio sincere VOBIS diem vestrum gratulari, qui nihil



in hoc officio consuetudini, nihil adulationi, nihil privatis commodis dent, auctoritati verò dignitatique VESTRAE, non illi quidem nihil omnino, attamen minimum attribuant; sed qui, cum vos cogitent, cogitent Reip. columninae praecipuis & firmissimis duo, cum incolumitatem VESTRAM, cogitent incolumitatem patriae, cum annis muneribusque graves vos, cogitent etiam virtutibus & meritis; qui denique sic de felicitate atque salute VESTRA, quasi in qua commune bonum versetur, sentientes, Deum rogent, inter piissimas votorum nuncupationes, ut, quorum bonorum partim auctores, partim custodes vos esse voluerit, eorum quoque testes, & arbitros, & Ipsos participes nobiscum esse quam diutissime iubeat. Haec est illa gratulatio, h. e. ipsa ad Deum gratiarum actio, non ad hoc tantum saeculum pertinens, sed ad omnem perpetuitatem consequentis temporis, neque terminanda cum vita VESTRA, quamvis illam VOBIS longam nostrae preces impetraturae sint, sed transmittenda ad omnem usque posteritatem, quae tum quoque, cum vos evocati eritis ad superos, prosequetur grata recordatione eorum virorum memoriam, quibus magnam partem prosperitatis suae deberi, traditum a nobis acceperit. Et sicut Laertius Diogenes \* narrat, Epicuri quondam

\* X, 18. Cic. fin. II, 31.



quondam discipulos magistri natalem anniversaria celebratio-  
ne coluisse, ita, qui post nos erunt, semper utrumque diem fe-  
stum habebunt, qui BORKOVIOS atque GIERIN-  
GIOS populo Thorunensi dederit. Quae igitur causae  
futurum aliquando saeculum impellent, ut, fuisse atque floru-  
isse vos olim inter maiores VESTRVM similes, gaudeat,  
illae nunc me ad eam laetitiam excitant, quae nolit iam intra  
pectoris angustias contineri, sed erumpat foras, testesque  
quamplurimos habere, & si possit, alios quoque provocare ad  
idem studium, gestiat. Itaque primo taceo, quibus rebus  
privatim domum meam devinxistis, quae praeterea sunt ita  
& multae & magnae, apud TE praecipue, MAGNIFICE  
BORKOVI, ut neque possint neque debeant perfuncto-  
rie, & velut obiter, tractari. Deinde quae publice a VOBIS  
gesta sunt, ne illa quidem volo commemorare, quae quanta  
exsint, cum in civitate universa, cui uterque praeestis, tum in  
Gymnasio, cuius TV summum praesidium es, MAGNIFICE  
GIERINGI, sentio equidem, ut qui optime, sed laudanda  
pro dignitate, ego ille indisertus & infans, tutius posteris per-  
mitto, inter quos futurus est illorum praeco, & facundior mul-  
to, & praeterea incorruptior, non unus. Me quidem una im-  
primis cogitatio tenet eius felicitatis, quam Commune Tho-  
runensium VESTRAE curae, VESTRISQUE consiliis debet,



quae duratura est, quoad aut Ipsi inter nos eritis vivi, aut sapienter a VOBIS constituta ventura aetas non immutabit. His enim gratulor potius, quam VOBIS, natalem VESTRUM, qui per vos optima pace & nunc fruuntur, & fruituri sunt postea. Quem natalem haud scio an multi singulari quadam, nonnulli autem stupida admiratione intuebuntur, cum videbunt vos constitutos, alterum in imo quasi gradu illius vulgo reformidati anni, alterum in summo, forte etiam auguria nescio quae inde capient. Quos ego non contemno simpliciter, qui scio, quantum olim a Varrone, a Plinio, ab aliis, longa inde usque a Chaldaeis observatione edoctis, disputatum sit super scanfilibus illis annis; sed me minus movet illud periculum, quod putem alterum subire cum hoc anno, alterum evasisse; quod si est aliquod, equidem toto animo & superatum gratulor, & superandum opto: plus me vero delectat, non ipse per se annus, ortus e septenario & novenario in se ductis; sed fastigium quodcunque senectutis, quod nunc uterque attingitis. Video enim non modo capitum illam, sed praecipue fidei & virtutis reverendam canitiem, nec ipsam hanc annorum gravitatem, sed ductam ab his experientiam, e qua una omnium maxime augurium certius atque laetius omnibus Mathematicorum, h. e. apotelesmaticae Astrologiae praedictionibus, capio, eius prosperitatis, quam maturitate consilio-

rum



rum VESTRORVM subnixam vos civitati nostrae & olim  
spondetis, & nunc Ipsi firmatis. Neque vero is ego sum, qui  
dilaudans istam ab annis experientiam aut senectuti in soli-  
dum illam, quae mentibus residet, prudentiam, velim adscri-  
ptam, aut omnino eam, nisi ab annis contrahi posse, negem;  
ut quandam in Germania nationem, omnibus & belli & pacis  
laudibus onustam, cavillantur. Nam si vellemus ad hanc  
velut annariam quandam legem sapientiam adstringere, ut  
pauci sunt, qui vel annos multos, vel cum annis usum rerum  
multarum habeant, sic verendum est, ne pauci reperirentur,  
qui sapientes dicerentur, pauciores, qui nominis illius men-  
suram implerent. Illud tamen dicere licebit, si quis praedi-  
tus mentis atque ingenii dotibus iis, quas in VOBIS suspici-  
mus, assequatur praeter haec eum, quem vos, numerum  
annorum, coniunctumque cum his eum, quem vos conse-  
cuti estis, publicorum atque forensium negotiorum multi-  
plicem usum, ab illo plus posse sperari, qui utrumque habeat,  
quam qui singula. Hic vero est, ubi videre mihi videor  
quasi campum late patentem, in quo mea exspatietur oratio.  
Cui quid impedit, quo minus frenos laxemus, illumque paul-  
lum persequamur locum, ad quem velut ex improvviso de-  
ductos nos videmus. ~~Ibi~~ Tanto id quidem lubentius facio,  
quod sperem, quae de publica per vos felicitate dixi, ex  
animi



animi mei sententia, exque sensu quodam illorum bonorum dicta visum iri, si demonstraverim id, quod demonstrabo, si vos veniam datis, cur mihi vere dixisse videatur, quisquis primus dixit: *Experientiam prope unam solamque esse rerum magistrani.*

Principio talis natura divinitus data est hominibus, ut ad experiendum prius, deinde etiam ad ratiocinandum, nati factique videamur. Etenim quaqua mittamus aciem oculorum, circumdati sumus rebus corporeis, quarum cognitio sensu efficitur. Nisi forte nihil extra nos veri solidique reperitur, nosque imaginibus tantum, variisque veluti somniorum speciebus ludimur, & quaecunque vel auribus accipimus, vel oculis, quaeque palatum adficiunt, vel naribus adflantur, vel tactui cedunt, ea non per has quasi fenestras intrant in animum, sed in ipso intellectu nostro & oriuntur & consistunt & occidunt. Est haec fatuitas primo ita prorsus ab omni, non modo philosophia, sed humana ratione, aliena, ut interdum ipsi larvas atque umbras, ut rerum isti, sic hominum hi, quibuscum pugnent, sumere sibi videantur, si qui aut putant esse aliquos, quos appellant Idealistas, aut tales, quales vulgo solent, animo informant. Deinde vero maneret sic quoque eadem experiendi necessitas, iisdemque legibus deciperent mentem nostram, quibus erudiunt atque percellunt



percellunt eam, rerum imagines; atque ut, qui vere videt sphaerae rotunditatem, semper eodem modo videt, ita qui videretur sibi illam videre, etiamsi non esset, tamen eodem modo, semper sibi videretur. Nunc vero sapientissimus huius universitatis opifex & illa omnia, quae nos circumstant, tam vera effecit, quam vere sumus ipsi, & ut a nobis possent cognosci, tamquam vias aperuit quinque, per quas cuncta extra nos, quae fiunt, quaeque sunt, ad animum nostrum allaberentur, quorum alia speciem nobis obiicerent suam, alia sonum referrent ad aures, alia linguae velut mollissimis glandulis, alia narium tenuissimis fibris, alia toto corpore possent sentiri. Ex quo existit singularum rerum cognitio, quas ubi saepius easdem sensibus experti sumus, oritur proportio, quam Graeci *αναλογιαν* appellant, quibus tamquam adminiculis erecta atque sublevata mens nostra postremo pervenit ad ea, quae omnibus communia sunt, h. e. ad universalem scientiam, quam nunc seiunctam a Metaphysicis nominant Ontologiam. Et postquam ars illa inventa est, praeclarissime profecto humano generi consultum esset, si iam ex illis universaliter dictis, quid sentiendum sit de singulis, colligi posset, liceretque imposterum, magno disciplinarum compendio, experimentis rerum capiendis supersedere. Nunc id usu venit, ut, quemadmodum imperatorum aliquem



ferunt adscendere ardore venandi avia montium potuisse, descendere, nisi praesenti aliquo numine, & quasi ἀπο μηχανῆς, non potuisse: ita illa, quae in universum de ente dici possunt, facilem illa quidem adscensum habeant, descensum vero difficillimum. Quod item fit in Logicis, ut intuendo exempla modosque rerum inventarum, possint leges erui quaedam, quas in aliis rebus indagandis alii sequantur, per easque, si modo recte utantur, extra errandi periculum constituti sint; sed illud ipsum, recte uti, summa difficultate laborat, prorsusque indocilem disciplinam habet, ut intelligatur, aut nemini profuisse umquam, aut potius nullam esse artem universalem veri inveniendi. Sed non est hic locus adversus artes illas disputandi, quod neque personae meae fatis conveniens est, neque caret invidia: libenter enim omnes dabunt mihi, quod volo, usu atque experientia res humanas esse cognoscendas.

Sed ut in caeteris rebus apparet, hominem homini auxilio esse datum, vitamque ipsam, quod ait Ennius, vitalem esse sine fociis hominum officiis non posse, ex quo principio in civitates, exuto ferarum more, coiri coeptum est: item videmus in experimentis rerum capiendis tradi operas mutuas, ut cum brevem ipsi naturae lege habeamus huius lucis usuram, parumque nobis ad experiendum spatii concessum



cessum sit, saepe etiam opportunitas cognoscendi quamlibet grandi natu hominibus desit, liceat in omni re, quae nostram diligentiam effugiat, uti alienis oculis tamquam nostris. Et quamquam in multis tutius est sibi credere quam aliis, stultum esset tamen, malle, quidquid ipse non experiaris, in hac praesertim brevitate vitae, nescire, quam discere ab aliis, quorum saepe fides atque testimonium plus valere debet, quam ipsi sui imperitis oculi. Ex his intelligitur, cum dicatur experientiam esse rerum magistram, experientiam dividendam esse *in alienam & in suam cujusque propriam*.

De *aliena* prius dispiciamus. Video enim eminus advenientem reprehendentium turbam, qui hoc improbent propositum meum, parumque probabilem experientiae laudatorem caussentur eum, qui ipse, quantum boni insit in illa, suo usu compertum non habeat. Nam quid? inquierent, habere tritum subactumque rerum vitaeque usu longo animum, quam sit utile quamque iucundum, illud hic nobis, si dīs placet, narrabit? ut si tu in pueritia constitutus inducas in animum senectutis recitare sive commoda sive molestias, quorum tu neutrum attigeris; aut palato nostro commendare instituas ciborum quasdam delicias, quas Apicius descripserit, non quas ipse gustaveris. Quibus ego non respondebo, me quoque, quamvis adolescentem, quamvis



paucorum retro annorum, quamvis exiguam, tamen aliquam habere experientiam; nec dicam intelligere me, & exper- tum intelligere, pueritiae saltem, quam excefferim, hos esse mores, quos Flaccus descripsit:

*Reddere qui voces iam scit puer, & pede certo*

*Signat humum, gestit paribus colludere, & iram*

*Colligit, ac ponit temere, & mutatur in horas;*

iuvenilia quoque ipsa, quae ibidem poeta depinxit, iuvenem me vera usu deprehendisse, (quam sobrie atque restricte, iudicandum relinquere illis, qui me norint;) sed illud dicam, ut de me nihil loquar, cadere tamen in adolescentem experientiam eam, quam disputamus, fierique posse, ut experi- entior sit alienis factis gestisque nonnullorum mediocris, quam plerorumque gravis aetas.

Ita est, quidquid est experiendo usuque rerum cogni- tum aut a singulis hominibus, aut a paucis, id illi non sibi solis, sed omnibus didicisse censendi sunt. Ipsa religio Chri- stiana, quae comprobata est maxime miraculorum editione, nonne labasceret, nisi niteretur experientia, tamquam fun- damento suo, aliena? Cum enim omnium ingentium fa- ctorum, quibus principio Moses cum reliqua ante-Messiano- rum sancta cohorte, postea Christus ipse cum Apostolis fidem divinae missioni suae fecerunt, nihil ad nos, nisi sola fama



fama atque descriptio pervenerit, ecquid relictum est nobis, nisi ut illorum fide stemus, *qui suis auribus hausta, suisque usurpata oculis, suis denique palpata manibus omnia nobis de illo vivifico verbo tradiderunt.* \* An vero etiamnum postulamus prodigia nobis insipientibus fieri, neque intelligimus, quae causae fuerint sub initia regni cœlestis miraculorum edendorum, eas nunc, illo condito, ad suumque prope fastigium perducto, esse nullas? Neque vero vim divinam in his agnoscet aut sentiet fortius is, qui tunc vixerit, cum illa gesta sunt, quive viderit, aut in seipso sit expertus, quam ad omnem usque ultimamque posteritatem quicumque consignata monumentis certis atque indubitatis illa accipiet. De morte C. Caesaris, utamur enim hoc, aequè omnibus, qui modo aliquid sciunt in historiis, constat, atque his, qui illis ipsis idibus Martiis Romae adfuerunt, quique ipsi audierunt clamores Bruti procurrentis in populum, manuque impia sublatum viderunt pugionem cruentum. In Evangelica autem historia, ut iam hinc quoque sumamus exemplum, exhausta illa fluxu sanguineo muliercula, fimbriaeque contactu ianata, quamquam ipsa corpore suo praesentissimi vim numinis experta est, convictio tamen de divina virtute maior in illa non fuit, quam quae in omnium mentibus excitari debet, qui de

\* I Joh. I, 1.



fide rerum gestarum didicerunt rectum iudicium ferre. Quod igitur Nicodemus ille recte vidit, caelitus missum esse Christum, quod portenta tam multa tamque magna edere, nisi divina vi praeditus, nemo posset; idem nunc quoque fateri debent hi, qui ea, quae suis oculis vidit Nicodemus, invictis monumentis tradita tam certa atque explorata habent, quam si ipsi arbitri atque testes interfuissent. Videmusne veritatem Christianam quibus tibicinibus fulciatur? non modo interna vi sua atque robore, sed ipsa sensuum experientia, sensuum vero, non quibus nos usi simus, sed quibus illi, quos neque ipsos falli potuisse, neque fallere voluisse, invictis totis libris demonstratum est eorum, qui defensionem religionis Christianae susceperunt.

Quid spes atque fiducia piorum? Nihil est, quod non illa exspectet ab eo Deo, qui omnia bona promiserit suis cultoribus, quaeque promiserit, velit, quaeque velit, possit. Qua cogitatione repleta mens piorum, sicut Abraamus quondam indubitate speravit ea, quae fieri posse aut solere nullo ad illum usque diem exemplo viderat;\* ita ipsa hunc imitata patrem fidei, nulla fortunae adversitate, nulla huius vitae calamitate, nulla dubitatione obiecta, ac ne morte quidem ipsa, dimoveri se a fiducia in Deum concepta patietur. At  
haec

\* Rom. IV, 17



haec quidem est *πληροφορία* tanta, quam ut recte requiras in omnibus, sic vereor ne reperias apud paucos. Est aliud velut nutrimentum fidei & sustentaculum, quo erectae mentes, infirmæ quoque & imbecillae, excitentur ad fiduciam erga Deum, cum intueantur omnium retro saeculorum omnes homines, in quibus exstantia exempla providentiae opisque divinae, sive fama & auditione, sive literarum monumentis, ad nos perlata sunt. Nam si homini nemo ita diffidit, ut non libenter medico vitam valetudinemque suam committat, si quis eius artis, quam profitetur, documenta idonea ediderit in aliis: quanto magis fidendum est Deo, etiamsi in adversissimis rebus nondum umquam auxilium illius ipse senseris, si consideretur, quantis ex angustiis, quam provide, quanta ex inopia, quam feliciter, quanta ex ignominia, quam gloriose saepe Deus eos eripuerit, qui animum non despondissent. Semper enim laeta atque iusta spes affulget, paria fortunae ludibria parem eventus laetitiam esse consecuturam.

Nec vero haec tantum pars historiae, quae continet exempla opis expertae ab aliis, mirifice nos quoque confirmat, sed in universum historiam omnem aio esse comparatam ad hoc, ut quidquid vel praeclare, vel turpiter, vel cum ratione & consilio, vel temere in unoquoque genere

gestum



gestum est usquam, ab eo omnis deinceps posteritas, velut  
experimento capto, discat partim prudentiae atque ingenii  
opes locupletare, partim reprehensionem atque vitia sedulo  
evitare. Atque haec quidem alienae experientiae cognitio,  
quae per historias accipitur, habet utilitatem tantam, tam-  
que certam, ut imberbi quoque adolescentiae senilem inter-  
dum intellectum det, expertamque faciat aetatem eam, a  
qua vulgo nisi rude & imperitum exspectatur nihil. Itaque  
in Somnio Luciani, quo ille, sicut Prodicium Herculem in  
virtutis atque voluptatis bivio, sic se facit constitutum inter  
Eruditionem & Statuariam medium; recte Eruditio pri-  
mum bonorum pollicetur adolescenti hoc, ut aliorum egre-  
giis dictis atque factis legendis, ipse rerum usum atque peri-  
tiam sibi mature contrahat.\* Hoc solum studium, non ulla  
suffultum experientia sua, quantum olim Lucullo profuerit  
in bello Mithridatico, numquam sine admiratione legi apud  
Ciceronem potest.\*\* Qui cum ne tirocinia quidem in ca-  
stris ulla posuisset, neque in ullius contubernio imperatoris  
vixisset, sed, uti narrat ille, quo disertior praeco ipsi con-  
tingere nullus poterat, *adolefcentiam in forenfi opera, quae-  
sturæ*

\* Tom. I pag. 8 Graev. επιδειξω σοι παλαιων ανδρων εργα και πραξεις  
θαυμασας, και λογες αυτων απαγγελεσσα, και παντων, ως ειπειν,  
εμπειρον αποφαινεσα.

\*\* Acad. II, 1.



*sturae diuturnum tempus, Muraena bellum in Ponto gerente, in Asiae pace consumsisset, tamen, ut erat incredibili quadam ingenii magnitudine, non desideravit indocilem usus disciplinam. Itaque cum totum iter & navigationem consumsisset partim in percunctando a peritis, partim in rebus gestis legendis, in Asiam factus imperator venit, cum esset Roma profectus rei militaris rudis. Hoc nimirum praestat rerum gestarum scientia erudito iuveni, quod indocto seni nulla aetas nullaque canities attribuet. Quare caussidicus quidam, non unus e multis, verum longissime ultra formulariam istam rabularum atque leguleiorum eruditionem sapiens, acute ei, a quo contemptus fuerat ob iuventutem, respondit: Ego ille iuvenis tanto antiquiores legi libros.\* Quanto enim longior est aetas, quae per historiarum lectionem, quam quae vivendo decurritur, & rursus, quanto plures actores in hac veluti vitae fabula historia nobis in scenam adducit, quam quos unius hominis aevum breve monstrat: tanto illa experientia, quae comparatur alienorum cognitione factorum, praeferenda est ei, quam quis suae solius usu atque consuetudine vitae contraxerit. Quo prudentiori consilio factum est, ut antiquorum potissimum Graecorum Latinorumque libri in scholas introducerentur. Non profecto, ut ex his syllabas colligere, aut huius saeculi*

C

in fice-

\* Je suis jeune, mais j'ai lû de vieux livres, Gallus enim erat.



inficetam, ut nunc fere est, Latinitatem intelligere discerent  
pueri, ad quam poterant faciliori multo ac breviori via per-  
duci; sed ut mature consuetudinem cum his contraherent,  
etiam viris non intermittendam, & felici quodam contagio  
inficerentur eorum hominum, quorum tota vita in maximo-  
rum belli pacisque negotiorum usu perpetuo versata, eloquen-  
tia autem formata esset, non in hac umbra ieiunis rhetoricae  
praeceptis sub ferula insudantium, sed audiendo oratores illos,  
qui opes, honorem, dignitatem, famam, vitam alienam tueri  
dicendo, sibi vero comparare haec omnia, & si quid maius  
esset in hoc imperio, quo clarius atque potentius sol nunquam  
vidit, potuissent. Cumque prudentiam dixerimus facillime  
augeri experientia aliena, eamque monumentorum tractatio-  
ne veterum fieri cuiusque propriam, quid utilius ad hanc rem  
esse potest antiquis historicis, qui nempe non erant ex illis  
domi desidentibus, quos *Lucianus narrat*, \* alienorumque  
nuntiorum levissima fide stantibus, sed quarum rerum scri-  
ptores, earundem magnam quoque partem actores fuere, tan-  
tumque rebus ac factis, quantum literis inelaruerunt. Com-  
memorabit inter summas laudes TVAS, MAGNIFICE GIE-  
RINGI, ventura aetas hanc non postremam, quod TVIS po-  
tissimum

\* De hist. confcr. T. I p. 628 Graev. τῶν καλοικιδίων τινες, ὃδ' οἱ οὐ πιστεύειν  
μονον τοῖς ἀπαγγελλασιν.



tissimum auspiciis TVOQVE comprobatu vigent in hoc nostro Gymnasio, ut in paucis, hae literae, quae non tantum homines faciunt & mansuetos, e quo humanitatis nomen acceperunt, sed, ut Achillem quondam suus Phoenix fecit *verborum oratorem actoremque operum*, \* sic ipsae utramque hanc vim, quae constat maxime experientia, & pariunt iuvenibus, & viris augment.

Jam in puerorum quoque educatione quantam vim habeat experientia, ut quisque pluribus in liberis educandis ipse versatus est, ita optime intelligit. Qui urere ignem credunt, vix cuiquam, nisi extremo saltem digito experti, illi pulchrum esse honestum, turpe autem flagitium, nolent profecto, nisi ipsi viderint, aut in aliis, aut in se, umquam credere. Affer his, praesertim invitamento iam aliquo allectis, vel ad ebrietatem, vel ad voluptatem, vel ad reliqua flagitia, e philosophorum ethicis libris ratiunculas quasvis, oscitabunt nimirum, aut parum certe fortiter commovebuntur, atque adeo Chremyli illud apud Aristophanem senis tibi ingerent: *Non persuadebis, si vel maxime persuaseris.* \*\* Vult aliquis a vino-

C 2

lencia

\* 11. 1, 443, μωδων γε πῶς ἢ μὲναι περὶ ἡμεῶν δε τῶν.

\*\* Plut. 600 & γὰρ πείσεις ὃδ' ἢν πείσης. simile illud Francisci Aristophanis, in mulieribus doctis, ni fallor:

Prêchez, patrocinez, jusqu' à la Pentecôte,  
Vous serez ebahi, quand vous serez au bout,  
Que vous ne m'aurez rien persuadé du tout.



lencia iuvenem dehortari, monstrabit ei, quod Lacedaemone fieri solitum narrant, tinctum aliquem poculis, gressu illo titubante, gestu lascivo, ore balbo, risum puerorum, virorum indignationem, commoventem; monstrabit, vel in tabula, illum in Xenocratis auditorio Polemonem, odium & ludibrium, quicumque audientium honesti erant; aut coram aliquem monstrabit, non iam vulgi propinatum derisui, sed vel ad incitas ingurgitatione sua redactum, vel morbo aliquo tristi, vel ipsa morte subita vini intemperie correptum; denique, si quid forte ipse tentaverit aliquando, recordari iubebit, qualis tum fuerit, quanto ferinae, quam humanae, naturae propior. Ille enimvero adolescens, credens oculis, credens experientiae suae, citius, puto, se hoc modo, quam frigidis interdum philosophorum conclusiunculis abduci ab inhonesto patietur. Pulchre, ut omnia, Flaccus, laudans ab educatione simili patrem suum, simul docens, antiquissimum hunc esse morem.\*

*Cum me hortaretur, parce, frugaliter, atque  
Viverem uti contentus eo, quod mi ipse parasset:  
Nonne vides, Albí ut male vivat filius? utque  
Barus inops? Magnum documentum, ne patriam rem  
Perdere quis velit. A turpi meretricis amore  
Cum deterreret, Sectani dissimilis sis.*

*Ne*

\* Serm. I, 4, 107 sqq.



*Ne sequerer moechas, concessa cum Venere uti  
Possem, deprensi non bella est fama Treboni,  
Aiebat: sapiens vitatu quidve petitu  
Sit melius, caussas reddet tibi: mī satis est, si  
Traditum ab antiquis morem servare, tuamque,  
Dum custodis eges, vitam, famamque tueri  
Incolumem possim.* - - -

Sed usquequaque circumspicienti mihi, quaecunque vel opificia, vel artes, sive manu sive ingenio exercendae ab hominibus repertae sunt, videntur illae, quae veriores perfectioresque habentur, usum solum fere magistrum habuisse, quarum vero incerta aut inelaborata disciplina est, iacere atque frigere, non quo ingenium studiumve hominibus deesset, sed quia, ut flamma sine nutrimento vim suam exercere non potest, sic illa vis ignea ingeniorum, ubi usu quodam rerum ipsarum experimentisque, velut materia sua, destituitur, exserere se frustra conatur. Cur enim tam macilenta est fere omnis de mente nostra, de spiritibus, de elementis naturae, de aethere, de siderum habitatoribus, similibusque, philosophia, nisi quia experiri homines ea, quae volunt, non possunt. Et quamquam plurimae res detectae sunt humani sollertia ingenii, tamen & saepissime ratiocinatione, sensibus non adiuta, scimus erratum esse, & coniecta atque adeo indagata feliciter non



prius ab omnibus, quam usu accedente, comprobata. Beati  
erant conclusionibus suis veteres, cum inhabitabilem & deser-  
tam facerent partem orbis terrarum unam maximam, idque  
non alia re, nisi quadam comparatione solis efficerent, cuius ob-  
liquis radiis cum tot populi torreantur, putabant, illos non posse  
non aestu confici, quorum vertici sol rectus immineret. Atqui  
experientia docuit, quam peregrinantium navigantiumque  
studio debemus, non utique incultas esse regiones illas, quae  
sub torrida, quam vocant, zona continentur, sed ut ambitu  
spatioque suo amplissimas, sic incolarum rerumque cunctarum,  
quas naturae benignitas hominum generi concessit, longe  
omnium fertilissimas, solis autem calore, quamquam incum-  
bente verticibus, tamen & montium altissimorum umbris, &  
fluviorum refrigerationibus, & crassitudine nubium, provi-  
dentissime temperato fruentes. Antiquorum vero illi, qui  
globosam esse terram, circumfluoque mari ambitam viderant,  
quamquam firmabant eam sententiam rationibus idoneis, ta-  
men apud imperitum vulgus illorum, qui nihil mente cernere  
didicissent, quod effugeret aciem oculorum, cum docerent  
esse aliquos infra nos, contrarios vestigiis nostris, qui Anti-  
podes appellantur, iisque lucem diei tunc oriri, cum nobis  
occidisset; quos clamores, quem contemptum, quas calumnias,  
quas denique vexationes ab imperitis sustinere? Vt nunc

illi



illi ipsi, qui in eadem re idem facturi erant, non possint sine indignatione aut risu legere, quae facta sunt Salisburgensi Virgilio, aut ea, quae suaviter declamavit ille, qui discere meliora e Tullio suo poterat, Tullius Christianus, extremo libro *de falsa sapientia*. Quorsum igitur haec? nempe ut doceamus, quamquam multa sagacitas hominum, sine ullo sensuum adiumento, perspexerit, tamen fatendum esse etiam hoc, eorum, quae non sunt usu ipso comperta, alia probabilia parum esse, alia ne certa quidem satis haberi. Quaecunque vero certa & constanti lege sciuntur & fiunt, ea omnia tentando, experiundo, conando, dies perfecit. Itaque de caeteris artibus Lucretius recte:\*

*Navigia atque agriculturas, moenia, leges,*

*Arma, vias, vestes, & caetera de genere horum,*

*Praemia, delicias quoque vitae funditus omnis,*

*Carmina, picturas & daedala signa polire*

*Vsus & impigrae simul experientia mentis*

*Paullatim docuit, pedetentim progredientis:*

*Namque alid ex alio clarescere corde videbant*

*Artibus, ad summum donec venere cacumen.*

In illis autem quatuor, quas appellant *facultates*, quibus omnes doctrinas artesque academiarum de more comprehendimus,



dimus, quis non videt, quam multa usus potissimum invenerit. Non ita bene scirent oraculorum divinorum depositarii, quam certam atque firmam, quamque undique suis armis suisque munimentis tutam veritatem custodiant, nisi usum partim subdolorum, partim apertorum hostium habuissent; neque tantos thesauros caelestis doctrinae e sacris literis eruissent, nisi tot huius divinae monetae adulteratores, non modo pro aere lupinos, sed id, quod vilius est lupinis, pro auro purissimo cultoribus veri obtrusissent. Neque item tam prompta ad omnes casus neque tam subtilis esset Jurisprudentia, neque ipsae leges tot quasi vallis atque aggeribus ad omnia effugia essent obseptae, nisi longa fori consuetudo, ac frequentes reorum exceptiones, captationes, praevaricationes, & sexcentae eiusmodi artes necessitatem legitimae scientiae imposuissent, mille nodis atque vinculis multiformem illum Protea constringendi. Ars vero medicina, quanta quanta est, adeo constat experientia, ut nonnulli etiam dubitaverint, utrum artium numero illam haberent, quae principiis certis atque generalibus videretur carere; alii autem empiricos a scientibus tamquam ignobiliores voluerint secerni; neutri, ut videtur, sine magno aliquo errore, nam neque ea, quae usus multiplex docuit, non possunt sub leges atque praecepta redigi, neque qui haec didicerit, quique omnium morborum causas gene-  
rales



rales noverit, non debet empiricus, h. e. eorum, quae quotidie aegrotantibus accidunt, & sedulus & perpetuus observator esse. Atque haec quidem disputatione non egent, apud te praesertim, MAGNIFICE BORKOVI, quem cum in caeteris rebus, tum in his quoque haud vulgariter versatum esse scimus; non ut, quam cum summa omnium laude reipublicae curam, eandem quoque corporum geras, sed quia capax illud & amplissimum ingenium nihil, verum atque utile quod sit, cognitione sua indignum putat; atque sic etiam, quanta mens, quam provide, pro communi felicitate excubet, ostendit.

Nec vero naturalis philosophiae pars illa tantum, quae dandae tuendaeque valetudinis tradit rationem, inventa atque amplificata est experimentis, sed quidquid fere in physicis cum ratione dicitur, ab illis prolatum est in lucem, non, qui velut ille nubem pro Junone, sic ipsi ingenii sui ludicra amplecterentur pro vero & pro re, sed qui attenti essent ad ea, quae gignuntur & fiunt, ac tum demum adiuti opibus iis, quas numerorum & quantitatum scientia praebet, peplum ipsum, quo se natura obvolvitur, quodammodo retegerent. Conferat aliquis cum hac naturali doctrina, quae nata in veteri Epicuri schola, diuque obscurata reliquorum nugis instaurata est a Gallico Gassendo, & inde translata ad Britannos Boyleorum Newtonorumque in sinu nutrita, exculta vero & ornata ab



universo doctorum collegio regio, accepta est inter Germanos, horumque & caeterorum ad occidentem populorum studio certatim amplificata; hanc igitur philosophiam, quae ad illum gradum, in quo illam videmus, pervenit experimentis, comparantibus pristinae Peripateticae, scholarum omnium per bis mille decursum annorum, unicae & magistrae & dominae, aliquidne videntur dicere isti, qui physica nugalia sua nobis vendunt, nec malunt in his rebus, quae referuntur ad sensus, expertis credere vel sibi vel aliis, quam philosophari, si tamen id est philosophari, cum Stagirita patre, qui, ut in caeteris disciplinis non indignus est laude inventoris & subtilissimi doctoris, qua nunc a nonnullis non sine iniuria defraudatur, sic in rerum natura explicanda friget totus, illamque ipsam aliunde partam gloriam obfuscet. Sed cum neque in hac amoenissima naturae cognitione, quam dicimus, neque in toto velut orbe & ambitu scientiarum, adeo omnia quis tradita accipiat ab aliis, ut non multa quotidie, versando cum hominibus & literis & artibus, discat ipse, dabitis mihi, DOMINI, apud vos loquenti hanc non spatiosissimam ultimam quasi clepsydram, ad quam de altera quoque parte experientiae, quam quis *suo usu* potest acquirere, pauca breviter differam.

Est iucunda, est & utilis, est necessaria denique experientia sua. Parumne voluptatis cum, qui multa viderit, fecerit, tulerit,



rulerit, sudaverit, alserit, percipere putamus, five ipso sensu praesentium & praeteritorum recordatione, five ab illa gloria & auctoritate, quam hinc apud alios nanciscatur?

*Dic mihi, Musa, virum, captae post moenia Troiae*

*Qui mores hominum multorum vidit & urbes.*

Ipsa expectatio delectat, adeo multum suavitatis poeta promittit in ipso ingressu legentibus. Quae si tanta est in animis eorum, qui relatum legunt de alio, quanta esse debuit in ipso, de quo scriptum habemus? Magno quidem, inquis, pretio. namque

*multum ille & terrâ iactatus & alto.\**

Atqui etiam adversarum rerum dulcis memoria interdum recurrit. Id enim significatur veteri Latinorum proverbio, quod *iucundos actos labores* dicit.\*\* Vt non omnino recte Themistocles videatur pollicenti cuidam artem memoriae respondisse, se vero obliviscendi malle artem discere. Cum enim agnoscamus animi illius magnitudinem, cui molesta erat in-

D 2

iuriarum

\* Utimur Virgiliano de Aenea, quamquam de terra nihil est in Odyssea, ne vel graece vel nostris esset verbis dicendum. Nam priora unde sint expressa, constat. Homerus sic:

*πολλων δ' ἀνθρώπων ἰδὲν ἄσφα καὶ νοὸν ἐγνώ*

*πολλὰ δ' ὅγ' ἐν ποντῷ πάθεν ἀλγέα ὄν κατὰ θυμόν.*

\*\* Explicat contra quam vulgo fit Cicero Fin. II, 32 & cum Euripideo illo confert, ἡδὺ σῶθεντ' αὖ μεμνηθῆναι πόνων.



iuriarum acceptarum, non modo ultio, sed obversans invito memoria: tum vero illud ipsum, passum esse iniuriam, eamque fortiter sustinuisse, & generose contempsisse, gratiam beneficio quoque, si potueris, benevolentia quidem certe, retulisse, utilitatem denique ab inimico eam, quam Plutarchus\* praecipit, percepisse, ea vero est tanta tamque solida ad animum, ut quisque est liberalissimus, voluptas, qua perfrui, quam diutissime fieri potest, plus profecto gloriae habet, quam cum iniuriae memoria omnem quoque fructum illius e mente velle auferre. Interrogemus hominem, si quis tota vita fuerit cum adversa fortuna colluctatus, naufragium fecerit, rem perdididerit, orbitatem subierit, exul patria caruerit, postremo, quidquid est laborum aerumnarumque, id omne exanclaverit; hunc igitur emersum ex his malis tantis, redditum pristino statui, in otioque iam laeto ac tranquillo viventem interrogemus, utrum quae durissima perpeffus est, eorum aliquid vellet non accidisse: nolit profecto, ut opinor, ullam illarum calamitatum non subiisse, certissimo indicio, adversos quoque fortunae casus, non modo ob illam ex eventu felicitatem, sed ipsa experientiae suavitate dulces fieri. \*\* Illa autem quae in

Cato-

\* Aureolo scil. libello πως αν τις υπ εχθρων ωφελοιτο.

\*\* Eleganter & sententiose, ut omnia, poeta Germanus, a quo nuper scriptas habemus *diversarum epistolarum* dodecadas duas, Francico illas



Catone \* Cicero commemorat, quae, si hic mos iam, qui Romae fuit, superesset, populi consensu contingerent eadem VOBIS, *appeti, deduci, reduci, consuli*, quaeque honoratissimis viris tribuuntur nunc quoque, *salutari, decedi, assurgi*, quanti putamus facienda? sunt enim honorabilia certe &, ut ibidem Cicero ait, *non cani, non rugae repente auctoritatem arripere possunt, sed honeste acta superior aetas fructus capit auctoritatis extremos.* Recte requirit honeste actam aetatem, cuius opprobria nimirum, si qua sunt, omnem, quae in senectute esse poterat, tollunt apud conscios auctoritatem, ipsa vero haec auctoritas cui auscultatur, cui creditur, cui omnis honos deferitur, quem diximus, nititur maxime coniuncta cum gravitate annorum experientia, quae facit venerabiles, summamque, ut senilis usuque plurimo tritae prudentiae

illam carmine, ne sola suis beata esset Boilaviis, Regneriis, Rossellis, (Rousseaux) Francia, sed argumenti gravitate atque dignitate multum illis eminentes. Sic igitur ille *Epître à Alceste le Misanthrope* Tom. I, p. 21.

*Je plains le fortuné, qu'aucun malheur n'afflige,  
Il me semble en effet, que le Ciel le neglige,  
Je suis tout glorieux, de pouvoir me vanter  
De mille & mille maux, que j'ai pu supporter.*

videtur in animo habuisse, priora quum scriberet, Demetrii Cynici vocem, quae est apud Senecam de Prov. c. 3, *Nihil mihi videtur infelicius eo, cui nihil usquam evenerit adversi.*



dentiae exspectationem, sic amorem atque dignitatem inter omnes conciliat. Itaque

*- - - magno in populo cum saepe coorta est  
seditio, saevitque animis ignobile vulgus,  
iamque faces & saxa volant, furor arma ministrat:  
tum pietate gravem ac meritis si forte virum quem  
conspexere, silent, arrectisque auribus adstant.  
Ille regit dictis animos & pectora mulcet.\**

Eoque in loco constitutus senex, etiam si summis hominibus arbitrium suum interponat, etiam si acerbiora quaedam, vixque ab alio ferenda, neque nihil gloriatiunculae habentia dictis admisceat, tamen non modo molestus non est suis sermonibus, verum etiam iucundus. Melleum \*\* quidem flumen orationis fuisse dicit Homerus in illo trisaecli Nestore sene, quo etiam infensissimi, ut tum erant, regum animi demulcerentur.

Sed cum hac summa suavitate, quam vidimus, coniuncta est non minor *utilitas*. Sanctus quidem Jacobus is, qui consobrinus frater Christi fuit, utramque simul afflictæ pietati Christianorum proponit. Primo iubet illos omnibus  
incedere

\* Aeneid. I, 152 seqq.

\*\* Ιλ. α, 249.

Ἰσ καὶ ἀπὸ γλωσσης γλυκίων μελῖος ῥέει αὐδῆ.



incedere laetitiis, si & varie & graviter contingat ipsos ad-  
versa fortuna tentari. Philosophus hoc dixisset, & iussisset  
nos mala nostra nobis gratulari etiam, scilicet illum ablega-  
remus ad severam porticum eorum, qui docuerunt, virtutem  
etiam in Phalaridis tauro & in equuleo esse beatam, & nega-  
remus tantam fortitudinem cadere in humanam naturam.  
Nunc is dicit, qui non a Zenone, non a Possidonio, sed a  
Deo haec praecepta accepit, atque etiam demonstrat, qui  
fructus hanc constantiam sequantur. Quorum primum est  
consuetudo ipsa patiendi, & quidam non obfirmati animi,  
sed virtutis veluti callus; deinde ea, quae coronat hanc vir-  
tutem, aeterna felicitas, quam negant primi Christianorum  
ipsi, nisi hac via laborum, attingi posse.\* O insigne bonum  
experientiam adversorum (sic enim optime appellabimus  
eos, quos ab experiendo dicit Apostolus *πειρασμός*) si non  
modo hanc breviorē vitam, quae immunis esse a corporis  
malis non potest, efficit saltem ab animi malis maximis pa-  
tientia immunem, verum etiam post haec id, quod maius  
est, praestat, perpetuitatem gaudii vitaeque sempiternam.  
Nuper is, qui Leibnitianam Theodicaeam perficere, qua  
parte nondum videretur Baelio satisfactum, aggressus est,  
felicitatis quamdam legem posuit hanc, ut sine aliqua mali  
admix-

\* Act. 14, 22



admixtione sentiri ipsa plene ac perfecte non possit. Itaque  
ne illis quidem, qui in caelo triumphant, permittit intami-  
nato ac sincero gaudio frui, sed singulis cohortibus caelitem  
singulos ex illis, qui poenis aeternis adficiuntur, sisti vult,  
quorum suppliciis comparata illorum felicitas ipso adspectu  
maior fiat. Crudelissimam vero voluptatem! dignamque  
non caelicolarum sanctitate, non Christianis, non homini-  
bus, sed illa Romanorum efferata immanitate, qui cruentas  
minime, tum quidem, nocentium mortes dulce sibi inter  
convivia spectaculum fecerunt. Valeat, valeat illa, legem  
dicam an potius labem? felicitatis, quam verendum est, ne  
tandem ad recte percipienda caeli gaudia necessitatem bea-  
tis, non fruendi dirissimo spectaculo, sed quod abominan-  
dum, aliquantisper sentiendi cruciatus ipsos infernalium  
suppliciorum, imponat. Absunt haec a caelestium liqui-  
dissima voluptate longissime, quae nonnullum locum habent  
in praesenti vita. Nam in iis rebus, quibus abundant, qui  
inter homines beati numerantur, quantum boni insit, eum-  
demum recte aestimare, qui contrarium aliquando expertus  
fuerit, omnes consentiunt. Itaque utile est ei, qui recte

valet,



valet, ut aliquando adversam quoque valetudinem, non exoptet ille quidem, sed venientem libenter excipiat, per quam non ipsa consecutura sanitas augeatur, nec id, quod illa habet, bonum, sentiatur efficacius, sed pretio suo melius aestimetur, excusso velut stimulis doloris naturali illo veterno, qui ab usu recto & salutari huius divini muneris, a meritisque gratiis datori eius agendis torpentes animos nimium quantum retardat. Non caret igitur magno comodo, cum alias res experiri, tum vero aegritudinem, non modo corporis illam, sed animi quoque, si quis effugere hanc omnino non potuerit. Nec tantum conducibilis est ea experientia ad illa, quae dixi, verum etiam ad hoc, ut solatium his, qui in simili sunt infortunio, possis afferre. Vt enim nihil molestius est homini in vero luctu versanti, quam plerorumque non profecta ab interiori sensu quodam, sed insidentia labris alloquia: ita contra nihil ad animum e summo squalore excitandum potentius est, quam illorum, qui sunt idem experti, consolatio. Neque vero consolantes intelligo vel hos, qui sola e commemoratione casuum similium & societate doloris praesidium laboranti



amico petunt, iam dudum enim id miserum solamen esse dixit poeta; vel illos, qui quae ipsi superarunt aliquando, superari & contemni in recenti etiam dolore imperant, quibus recte dixeris Terentianum illud: \* *Facile omnes, cum valemus, recta consilia aegrotis damus. Tu si hic sis, aliter sentias*; sed illos, qui fomenta vulneribus, qualia, quando, quomodo sint adhibenda, usu suo potius quam dictis praeceptisve aliorum didicerunt. Multa praeterea dici possent, quibus rebus praestet utilitatem experientia propria. Itaque exorsus a poetis, dicerem v. c. Homeri Boeotiam non fuisse nos habituros ita pulchram, totamque Graeciam in ea non ita vividis coloribus depictam, ut non modo carmen admirabili varietate illa divinum plane, sed accuratam quoque Geographiam legere nobis videamur, cuius fide etiam finium regundorum certamina Graecos interdum composuisse, Strabo testis est; hanc igitur descriptionem omnium oppidorum, omniumque prope vinearum, & columbariorum adeo, tam iucundam non haberemus, nisi ipse poeta omnia obiisset, oculisque attentis perlustrasset; nec Britanni-

CUS



cus ille Homerus tam feliciter nobis immortalis illo poetico  
penicillo adumbratum fecisset Adamum modo incommoda  
amoris recensentem, modo fractum uxoris precibus, ipsam  
vero prehendentem viri genua, gratiamque illius suis blan-  
ditiis reconcilians, nisi accidissent ea, quae primo amanti  
in iuventute, deinde viro ab uxore deserto, usu venisse, e  
vita illius relata legimus a Germanico Milioni interprete  
pag. 484, 487. Haec igitur & plura talia cum exposuisssem,  
deinceps ordine percurrerem doctrinas artesque reliquas,  
quamque multa in his discenda sint usu suo cuiusque, quae  
vix praestet experientia aliena, dicerem, nisi religio esset  
sermone longiori tempora VESTRA, quae sunt publicis di-  
spensata commodis, morari; quae religio facit, ut illud i-  
psum, quod restat, *necessariam* esse hanc experientiam, quam  
disputamus, tribus modo verbis attingere, quam copiosa  
demonstratione, nec praeterea difficili, persequi malim.  
Constat enim quam multam quotidianarum in vita rerum  
cognitionem solo usu quodam indocili accipiamus, ut sunt  
ea, quae oculorum auriumque iudiciis discernenda vide-  
mus, sonorum intervalla, locorum distantiae, colorum va-



rietates, quae, ut sine hoc sensu videndi audiendique, quo  
sumus praediti, intelligi non possunt, sic mollia, aspera,  
dulcia, acerba, foetida, suaveolentia quae sint, solo palati  
nariumque & tactus usu perpetuo, indeque a prima aetate  
firmato, discimus. Ab his autem vulgaribus transeuntes  
ad ea, quae sunt maiora, videmus Theologiam (utamur  
enim instar omnium hac sanctissima disciplina) utilem atque  
veram esse hanc, non quae arrepta auribus & percepta intel-  
lectu in animum ipsum numquam altius illabatur, sed quae  
usu quoque comperitur, totaque mente quasi imbibitur, in  
eaque gignit illam *πληροφοριαν* sive fiduciam, quam con-  
ceptam haerentemque imis medullis Spiritus sanctus idem,  
qui dedit, evelli inde rursus haud facile patitur. Ex quo  
est illud Chemnitii praeclarissime dictum, de iustificatione  
per fidem, h. e. de condonatione culpae non sequente bene-  
facta nostra, sed promeritum Iesu Christi, illum optime  
*θεολογεῖν*, qui inter agitationes crebras animi, delictorum  
suorum magnitudine & indignitatis reputatione contremi-  
scentis, interque perpetua resipiscendi exercitia & pavores  
mortis, hanc doctrinam pertractaverit, secumque habitare  
suae



suae infirmitatis conscientia, ac sibi diffidere, spem vero  
 omnem in universi expiatore generis humani reponere di-  
 dicerit. Sed & prior ille Ecclesiae nostrae magnus Marti-  
 nus, tantoque Chemnitio maior, quanto maior est, qui  
 veritatem diu sepultam ex abdito eruit, quam qui inventam  
 defendit, is quoque in Theologo absoluto & perfecto requi-  
 rebat praeter *orationem* & *meditationem* tertiam *tentatio-*  
*nem*, h. e. usum & experientiam; illa enim fecit Lutherum  
 ipsum praecipue talem, qualem cognovimus & admiramur,  
 illa *Melanchthones*, *Spalatinos*, *Chemnitios*, *Gerbardos*, *Io-*  
*annem*, & illum inter Hymnopoeos nobilem, *Paullum*, dedit  
 Ecclesiae, illa multum in hac etiam civitate sacro coetui pro-  
 fuit, illa vobis commendavit caetera quoque, si qua amatis  
 in patre meo bona, illa - - - Sed nescio, quomodo in  
 ipso exitu ad domesticas laudes mea deflectit oratio, quae  
 aut VESTRAS tantum debet commemorare, aut, si id non  
 potest, ut non potest, silentio ipso magnitudinem illarum  
 significare. Itaque finem huic epistolae impono, solam ad-  
 iungam votorum meorum hanc, ut liberati eius  
 natalem



VESTRVM inter auctricia, non iam prudentiae VESTRAE, cui  
nihil forte usus adstruere potest, verum eius voluptatis,  
quam e factorum consiliorumque VESTRORVM fructu capitis,  
experimenta, quam diutissime agatis. Scr. Thoruni a. d.  
26 Aug. clcIo ccxxxviii

# MAGNIFICORVM NOMINVM VESTRORVM





Biblioteka Jagiellońska



stdr0025602



